

Egualitad da pajas dad um e dunna

La regenza respunda a la dumonda parlamentara da la fracziun socialdemocratica

DA MARTIN CABALZAR

■ **En ina dumonda parlamentara vul la fracziun socialdemocratica savair da la regenza co i stat cun l'egualitad da pajas tranter um e dunna en l'administraziun publica. En sia resposta punctuescha la regenza ch'ina examinaziun externa da la situaziun haja cumprovà ch'i na dettia nagina discriminaziun sistematica tar las pajas da las dunnas tar l'administraziun chantunala.** En sia interpellaziun constatescha la fracziun socialdemocratica che l'egualitad da pajas tranter um e dunna saja francada dapi passa 36 onns en la Constituziun federala. Malgrà quai dettia anc oz differenzas da pajas inexplitgables tranter um e dunna. L'onn 2017 muntavia quella a 7,4 pertschient, ha l'interpellanta *Sandra Locher Benguerel* constatà. Quai saja inacceptabel. En vista a quests fatgs stoppia il sector public – saja quai sin plaun federal, chantunal u communal – ir ordavant cun il bun exempel. En quest senn haja la confederaziun elavurà ina charta per il maun public. Ils 6 da zercladur 2016 haja er il chantun Grischun legrai vlamain sutscrit quest appel. «L'appel è in ferm signal pertutgant la realisaziun da la lescha d'egualitad en il sector public e tar las corporaziuns dal maun public», accentuescha Locher. A medem temp possia uschia vegnir encurschà il sector privat da suandar quest exempel.

Lavur da sensibilisaziun

Cun sutscriver questa charta saja noss chantun obligà da sensibilisar sias collavoraturas e ses collavoraders ch'han l'incumbensa da fixar las pajas e da valitar las funcziuns d'examinar regularmain che l'egualitad da las pajas vegnia resguardada en l'administraziun publica. Plinavant s'oblighescha il chantun d'encurschar las corporaziuns dal maun public da far il medem e da dar la gista paisa a l'egualitad da las pajas er en il rom dals fatgs d'acquisiziun e/u da submitziun e da rapportar davart ils resultats concrets da quest engaschament.

Concretamain vulan ils socialdemocrats savair da la regenza co ella sensibilisescha las collavoraturas ed ils collavoraders, co l'egualitad da pajas vegn control-



En num da la fracziun socialdemocratica ha deputada Sandra Locher Benguerel inoltrà ina dumonda parlamentara concernent l'egualitad da pajas tranter um e dunna en l'administraziun chantunala.

FOTO O. ITEM

lada e co ils resultats da questas examinaziuns vesan la finala or.

La regenza pren posiziun

La regenza constatescha en sia resposta che per fixar las pajas sco er per classificar las funcziuns en classas da funcziun e paja sajan cumpetentas las instanzas d'engaschament en enclegientscha cun l'uffizi da persunal. En la gronda part dals cas discuta l'uffizi da persunal questas dumondas directamain cun las manadras ed ils manaders dals posts da servetsch. «Ils responsabels èn sensibilisads per las pretensiuns da la politica d'egualitad e sa tegnan al current cun frequentar dietas naziunalas davart il tema egualitad da las pajas en il sector public.»

En connex cun l'introducziun da la nova valitaziun da las plazzas da lavur realisada l'onn 2010 da l'uffizi da persunal en collavoraziun cun la firma externa confer SA sajan vegnidas resguardadas cunzunt er experientschas sin il sector da l'egualitad. Uschia sa basia la valitaziun

analitica actuala sin in catalog da passa 50 criteris neutrals areguard las schlattainas, punctuescha la regenza.

Nagina discriminaziun sistematica

Il rapport da la firma confer SA ch'è stada incaricada da repassar las valitaziuns da las funcziuns e da controllar sch'ils salaris da las dunnas èn discriminads haja mussà ch'i na dat «nagina discriminaziun sistematica» da las pajas tranter las schlattainas. Questa conclusiun na saja betg stada sorprendenta cunquai che las plazzas da l'administraziun chantunala sajan vegnidas valitadas gia avant quest repassament. Quest sistem analitic per valitar plazzas da lavur è neutral areguard las schlattainas e sa basa sin criteris scientifics. Il medem valia era per ils instituts chantunals autonomi e per las dretgiras chantunales.

Egualitad tar submitziuns publicas

Las acquisiziuns publicas hajan l'intent da cuntanscher ina concorrenza econo-

mica e libra da discriminaziuns tranter ils purschiders. Sco en auters chantuns laschia er il Grischun confermar las cundiziuns da lavur cun agid d'ina autodecleraziun. Sch'i dettia dubis e suspects tar in purschider damondian ils posts da surdada ulteriurs scleriments da las instanzas correspondentas. «En cas d'indicaziuns falladas smanatschan al purschider l'exclusiun da la procedura u ina bloccada da durada limitada», scriva la regenza.

Per motivs da custs sco er pervia d'enconuschientschas mancantes na saja betg pussaivel u cunvegner da dar regularmain scleriments pli detagliads sin il sector da l'egualitad da pajas en connex cun submitziuns. En vista als fatgs ch'ina controlla da discriminaziun è gia vegnida fatga e ch'il sistem actual da valitaziun è in garant per la nundiscriminaziun da las schlattainas n'èsi ni necessari ni adequat d'investir vastas resursas per concepir ulteriurs instruments d'analisa, concluda la regenza.